

Ils Tuatschins s'engaschan per la cultura indigena

La Renania e la Romania han visitau il Forum cultural da Tujetsch

(ac) **La sonda passada ein sescuntra en Val Tujetsch commembers dallas suprastonzas dalla Renania e Romania cun ils representats dil Forum cultural da Tujetsch. Tgei porschan las uniuns romontschas e tgei prestan las instituziuns indigenas ei stau in tema dalla sentupada.** Tgei ei quei atgnamein cultura? Quella damonda ha *Martin Mathiuet* dil CCM da Laax tschentau als presents a caschun dalla scuntrada a Tujetsch. Ellas localitads dil Museum la Truaisch a Sedrun eran buca mo seradunai representants dil Forum cultural e dallas duas suprastonzas Romania e Renania. Per discussiunar problems actuals ella lavur culturala ein stai envidai presidentas e presidents dalla uniuns localas sco era in representant dalla suprastonza communal. Tgei muenta las uniuns localas e tgei spetgan ellas dallas organisaziuns romontschas en Surselva? Quei ed aunc auter ei vegniu discutau alla meisa rodonda el Museum la Truaisch.

Il tema finanzas dominescha

Vegn ei tschintschau da lavur culturala vegn ei spert tschintschau da finanzas. Quei ei bein era stau il cass el Museum la Truaisch a Sedrun. Quei che maunca denton a biaras stentas e projects culturals en tiara romontscha ei in sponsoring professional. Cheu semuossan las pusseivladas d'in sustegn entras il CCM. La sedia dils collaboraturs regiunals dalla Ligia romontscha en Surselva che sesanfla a Laax.

Cun smarvegli han suprastontas e Romania e Renania pudiu endriescher dallas estructuras intactas ella Val Tujetsch quei che pertucca las uniuns localas. La giuventetgna ei integrada e collaborescha per gronda part. Era sch'els ein fatschentai duront la jamna ordvart tuornan els sur sonda e dumengia per separticipar alla veta culturala. Quei ei in mussament che quella veta funcziuna. La discussiun ha mussau ch'ina caussa ei evidenta per la veta culturala d'ina regiun. Ei drova persunas che s'engaschan voluntari e per plascher dalla caussa. Quellas persunas ein avon maun en Val Tujetsch. Era sch'igl ei magari grev d'anflar ina successura ni in successur per in ni l'auter post. *Margrit Darms*, commembra da suprastonza dalla Romania ed oriunda da Glaruna, ha menziunau che las uniuns sappien integrar il meglier persunas da lieunga jastra che setraigien neutier cun surdar ad ellas incumbensas e responsabilidad.

In forum cultural ordvart activ

La vischnaunca posseda in Forum cultural ordvart activ. Da quei han Romania e Renania saviu seperschuader el liug. Il president dil Forum cultural, *Andre Schmid*, sco er il cassier, *Tarcisi Hendry*, han presentau las stentas dil forum, seigi quei cun las lavurs da manteniment vid la ruina da Putnengia a Dieni sco era aunc auters projects realisai ni en mira. Dalla extraordinaria exposiziun el Museum la Truaisch han Renanians e Romanians medemamein saviu prender investa. Igl enconuscent fotograf Emil Brunner ei era staus en Val Tujetsch ils onns curonta. Sias impressiuns dils affons da lezzas uras ein exponidas actualmein. La presidenta dalla cumissiun museum *Barla Monego* ha buca sulet presentau il fotograf e sias ovras. Ella ha saviu relatar davart experiencias persunalas ch'ella ha fatg sco affon cun il fotograf da Glaruna. Il gerau *Toni Schmid*, denter auter responsabels per la sparta cultura, ha fatg in per indicaziuns davart la vischnaunca. Ina vischnaunca che posseda actualmein pervia dalla Neat ina gronda part populaziun jastra. Quei denton para buca da procurar per fastedis alla populaziun indigena.

Il fazit che Tarcisi Hendry ha tratg alla fin dalla viseta vala ton per las instituziuns culturalas d'ordvart sco per las uniuns tuatschinas: «Nus munglassen sescuntrar pli savens. »



Il representants dallas uniuns tuatschinas, dil Forum cultural, dil Museun la Truaisch, dalla suprastonza communal sco era la presidenta dalla Renania ed il president dalla Romania ein sepresentai a casc, hun dalla scuntrada en Val Tujetsch. Foto: A. Cadonau